

Enformaziuns y Comunicaziuns

Oraziun: En jöbia ai 22 de merz ales 20:00 s'encunta te salf de calogna le grup de Oraziun con signor Sepl Granruaz. Düc canc é enviês y bënödüs.

Granares dal Orí: Le Zënter Families y la Ploania enviëia mitans y mituns da gní a fá les granares dal orí, en vëndres ai 23/03 ales 14:30 dan salf dles manifestaziuns d'Al Plan. I mituns mëss ester acompagnês y dess se tó do na forfesc y la maza. Enformaziuns pa Veneranda al 338/9229824. Düc é spo enviês da gní en Domëgna dal Orí ai 25 de merz coles granares a les lascé benedí y tó pert ala prozesciun y Gran Mëssa.

Referat: En jöbia ai 22 de merz ales 15:30 él tla Stöa da Oies sön Badia en referat con signor Sepl Granruaz dal titul "Ciodi é pa les iniustizies y les soferonzes dla cruzifijiun de Gejú bones da se dé salvëza y liberaziun?" Le referat vën organisé tla cornisc dles encuntades dal grup "Atmosfera", tres le Raiun Sozial; la manifestaziun é daverta a düc. Enformaziuns plü monüdes pa Sabine Rainer al 0474/524519


Sorvisc ai Jogn: Al vën lascé alessëi che al é ciamó posé lëdi pal Isté Deboriada: tles edemes dai 9 ai 27 de messé a La Pli, tles edemes dai 30 de messé ai 10 d'agost sö Rina y dai 13 ai 17 d'agost a Al Plan. Pal **Cool Summer** él ciamó lerch pla "Bike Week" y pal "Artist por n'edema". Pal **My Summer** él ciamó lerch pal "Curs da arpizé" y pa "We are active". Enformaziuns ciafun te Sorvisc ai Jogn al 0474/523070.

Migranc: Por i migranc (richiedenti asilo) co roará te Mareo, vëgnel chirí linzos, cîsces da let y da plomac, pezes da mans de vigne mosöra, patüc de ciasadafü desco goti, copes dal cafê, massaries da mësa, cortí y valgünes de bones fanes (prëibel te de bones condiziuns). Por enformaziuns pón contaté Elisabeth Frenner al 338/8755312.

Musiga: La Musiga "Catarina Lanz" enviëia a na sëra d'enformaziun, en sabeda ai 24 de merz ales 18:00, te local dles proes. Al gnará baié dles poscibilitês da emparé da soné en stromont. Düc i mituns, jogn y geniturs enteressês é bënödüs!



La comunité d'Al Plan ti aoda döt le bun, sanité y benedisciun ai geniturs **Peter Mutschlechner y Petra Pitscheider** por le Bato de picio **BEN**.



Gejú á dit: „Chi co creï te me, vir ince sce ai mör!“
La comunité d'Al Plan tol comié da **Angela Erlacher vëd. Terrabona** morta al'eté de 75 agn. Ai familiars les condolianzes plü sontides. Che ara pálsi tla pësc.

Impressum: Ploania d'Al Plan, str. Catarina Lanz nr. 46, 39030 Al Plan de Mareo
Comunicaziuns - cina al dedemesaledema sëra - da mené a: Pablo Palfrader
Tel. **333 4762010** Mail: **ploaniaalplan@gmail.com**
Download plata: **www.unitepastorala.org**



Plata dla Ploania Al Plan de Mareo San Vighile

Ploan: Signor Heinrich Perathoner
E-Mail: **ploaniaalplan@gmail.com**

Calogna Al Plan: **0474 501006**
Radio de Ploania: **93,00 MhZ**

UNITÉ PASTORALA



VAL BADIA

www.unitepastorala.org

Ann B

18.03.2018 - Cuinta Domëgna de Carsëma

nr. 16

La cherta dal Vësko ai jogn - 2. pert

"Partí y daidé!"

Dignité

Y sc'i damanëis ci co ves dá orientamont y ci co é emportant, spo lascesse sön osta sensibilité por la dignité umana, sön osc dejidêr do relaziuns co gareta, do amizizia y l'ester atló önn por l'ater. Jide do chi trus co ti dá la poscibilité ala jont de nüsc paisc y sora döt le monn da vire tla liberté

La liberté é le post, olache vigne porsona pó svilupé söa particularité. Y al é ince la liberté co se sbürta da sorantó responsabilité. Mo ci ô pa dí responsabilité? Responsabilité ó dí se formé na minunga y la defëne, chirí fora ci ch'an á reconesciü desco bun y dërt y le mëter en pratica, por che le monn sides en pü' miú endoman y ái en aspet plü uman. Ince sc'al ne pö nia datrai ensciö: vignöna y vignönn de os pó armere val! Anfidesse! Viede osta responsabilité! Ciarede desco ince le bun vá so tru sora döt le monn, deache porsones mët man con de picí vari dër concrec da fá le bën!

Solidarieté

Degügn de nos ne pó vire da se enstës. Con nosc ester porsona depenunse da valgügn co s'an tol sora de nos. Cösc vën dandadöt desmostré - mo nia mâ - tal mëterman de nosta vita. Os ëis en sentimont dër sot por cösc, sc'i sotriessëis tres endô tan emportantes che familia y amizizia é te osta vita. Ti jí pormez a d'atres porsones y ester solidai con ëres canche ares s'adora, cösta é la resposta a döt ci ch'i án ciáfé, nia merité y debann, te nosta vita. Cösta afeziun ne ti vá nia mâ ales porsones co é liades a nos tres i raporc familiars o de amizizia, no, cösta afeziun ti vá a dötes les porsones co é tla meseria y adora nosc aiüt - cösta é espresciun plü sota dla dignité umana! N'él nia da se sperde y da ciáfé coraje tal medemo momont da odëi che al foss assá da vire por tan de porsones, sc'ara jess da partí sö plü iüstamonter les ressorses y da müdë datrai nosta manira da consumé, olache tan trep vën ince sciuré demez?

Y empó: i mo emplësci de speranza y reconescionza, canche i vëighi tan ch'al ves stá a cör che al vëgni fat plü iustizia tal monn y tla sozieté, canche i vëighi tan trec de os co é arjignês da partí y da daidé. Nia püc de os scinca ince atló da nos tomp y forzes por ti sté dlungia a porsones co adora aiüt, sides tres uniuns y assoziaziuns, organisaziuns d'aiüt, tres aziuns de solidarieté, co ince tal chît, enló olache al vën adoré tla vita da vigne dé en cör davert y na man co dëida.

Domègna: 18.03.2018: V. Domègna de Carsèma: S.Cyrrill, S.Eduard



8.30: S.M. a La Pli

9.30: Corona por +nta Angela Erlacher

10.00: S.M. pro popolo por dōta la Ploania
2. Requiem por +nta Angela Erlacher

18.00: S.M. por +nc' dla Fam. Piazza Albin y Teresa
S.M. por +nta Pallhuber – Rubatscher Hermine
S.M. por +nt Fighile Erlacher da Torpei
S.M. por +nc' Erlacher da Torpei
S.M. de rengr. de na porsona

Lön.19.03.: Festa de S.Ojöp Laurante: Festa dai Èi, Omi y Peri

N.B.: **18.00:** S.M. en onú y rengr. a S.Ojöp: pere y laurante

S.M. por +nt Fighile Obojes dal Craizer
S.M. por +nt Pepi Mellauner dal Köstner

Dédol.20.03.: Feria dal lönesc dla 5. edema de cars: S.Wolfram, Sa.Irmgard

19.30: Corona de Carsèma

Dédem 21.03.: Feria dla 5. edema de carsèma: Sa.Emilie, S.Absalom, S.Cristian

18.00: S.M. por +nc' dal Medo
S.M. por +nc' Maria y Gianni Zucchelli
S.M. por +nt Josef Kosta
S.M. por +ntes Maria y Etta Pisching de Candido

Jöbia 22.03.: Feria dla 5. edema de cars.: Sa.Lea, S.Clemens, S.August

18.00: Via Crucis – Les Staziuns

Vëndr.23.03.: Vëndres dla 5. edema: S.Turibio, Sa.Rebekka

7.10: S.M. por i scolari

S.M. en onú dal Spirit Sant
S.M. por +nt Trebo Hermann dal Schneider
S.M. por +nc' dles Fam.Prousch – Perathoner y Runggaldier
S.M. en sufragio dles Püres Animes

18.00: Via Crucis – Les Staziuns

Sab.24.03.: Sa. Maria in sabato - carsèma: Sa.Catarina, S.Elias

Preparaziun ala Pasca

15.30: Preparaziun ala Pasca por Èi, Ères y Jonèza

Pissia

18.00: S.M. con S.Comuniun da Pasca

Dom.25.03.: Domègna dal Urí: Sa.Margareta, Sa.Anzilla

Oferta por i bojügns dla ploania

8.30: S.M. a La Pli

10.00: Sön paiun o plaza de comune
Benedisciun dal urí y prozesciun te dlija
S.M. dla domègna dal urí con la Pasciun

14.00: Funziun dal Bato: Ben Mutschlechner

18.00: S.M. por +nc' Franz Ties y Erna Rieder
S.M. por +nta Verra Cristina
S.M. por +nta Anastasia Rindler de Costata
S.M. por +nt Rindler Guido de Pal



Sant Ojep

Ai 19 de merz festejèia la Dlija la festa de S. Ojep. Al dedaincö pöl che S. Ojep sii en pü' desmoncé, mo al é: dal 1870 patronn la Dlija Catolica y ea adöm a Sa. Maria önn dai patrons particulars dal 2. Conzil Vatican. Tla epoca dal Baroch gnea S. Ojep gonot rapresenté en punt de mort - por cösc motif él ince le patronn dai moribondi.

Ponsier dla 5a Domègna de Carsèma

Chi co chir Gejú, se chir enstès,
chi co se dá da fá por Gejú,
ciafa se enstès. (Philipp Spitta)
Tla maestosité de so amur,
tal socrèt de sòa pasciun y devènta,
pó töa vita ciafé ligrèza sonza fin.

(Hanna Hümmel)

Tomp prezii

Vigne porsona á so tomp: dis, agn, ... Tomp co se lascia mosoré con i contegnüs dla vita. Tert o adora vègn dōtes les calcolaziuns dal tomp metüdes en discusiun.

Degun de nos sá, tan de tomp ch'al ti romagn ciamó, denant che la mort mèti na fin a sòa esistenza sön cōsta tera. "Chi co tinn a sòa vita, la pordará", dij Gejú te sòa ultim discurs a Jerusalem. Al baia de na pordüda y ne mina nia ma la mort.

Tan de vita y liberté pordunse pa de por de te de slec vic, da chi che i ne sun nia bogn da nes destaché - te combatimonc por le podèi, ch' i ne orun nia dé sö - te festidi y sigurèzes, bëgnester, te stima, respet. "Chèl co ó mo sorví, vègnes do a me", dij Gejú. (Sb)

I ponsun do

Te nosta sozieté cunta trep le dèrt dal plö sterch. Vignönn tól, tan che al é bun, y chèl co é massa debl, á belo damperfora pordü. Le Vagnele nes ensègna en n'atra vijun dla vita. Gejú nes á scinché ia desco en granel de formont, co mör, por che al pói crèsce vita nea.

I periun

Pere tal Ci, desco en granel de formont toma tla tera y mör, ensció á to Fi scinché sòa vita. I te periun: Dásse forza por na manira da vire, co se orientèia do to Fi, chèl co vir y regnèia tal eternité. (Sonntags-Bibel)

Sorvisc dai Ministronc

Lönesc 19/03 (07:30h), Dédemesaledema 21/03 (18:00h), Vëndres 23/03 (07:10h): Caspar y Pia Videsott;

Jöbia 22/03 Staziuns (18:00h): Lucy Call, Madalena Deval, Chantal Feichter, Elisa y Emanuel Frenademetz, Michael Leimegger;

Vëndres 23/03 Staziuns (18:00h): Sofia Castlunger, Emma Daverda, Isabel y Sandra Ties, Sofia Willeit;

Sabeda 24/03 (18:00h): Anna, Linda y Luca Clara, Claudia y Susan Kaneider, Hannes Ploner, Giada y Ginevra Regis;

Domègna 25/03 Domègna dal Orí (10:00h): Moltina Clara, Matteo Huber, Lara Fappani, Marco y Sofia Alberti, Lucy Call, Madalena Deval, Elisa y Emanuel Frenademetz, Michael Leimegger;

Domègna 25/03 Domègna dal Orí (18:00h): Gabriel y Paul Trebo, Roman y Tomas Oberlechner, Philip y Tomas Palfrader, Simon y Giovanni Complio;

N. B.: Düc i ministronc é entres begnodüs da gní a sorví, ince sce ai n'é nia scric sö!



Fünfter Fastensonntag

